

# Meeqqerivinni kommuninit namminersortunillu pigineqartunit ingerlatsinissamut kommunimik isumaqatigiissuteqartunik kommunalbestyrelsip nalinginnaasumik perorsaanikkullu nakkutilliinera pillugu Namminersorlutik Oqartussat nalunaarutaat

Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsissaattut siunnersuut nr. 16, 3. december 2012-meersumi § 5, imm. 4 naapertorlugu aalajangersarneqarpoq:

## Kapitali 1

### *Nakkutilliinerup atuuffii*

§ 1. Kommunalbestyrelsip meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisaanni § 5, imm. 2 naapertorlugu nakkutilliinini meeqqeriviit kommuninit namminersortunillu pigineqartut ingerlatsinissamut kommunalbestyrelsimit isumaqatigiissuteqarfigineqarsimasut pitsaassusaannik imarisaannillu ineriartortitsisumik qulaajaasuussasooq qulakkiissavaa.

*Imm. 2.* Kommunalbestyrelsimit meeqqerivinni perorsaanikkut sulineq Inatsisartut inatsisaanni siunertanut aalajangersakkanik naammassinninnersooq nakkutigineqassaaq, tassunga ilanngullugu perorsaanikkut suleriaaseq piumasaqaatinik Inatsisartut inatsisaanni inatsisinilu allani atuarneqarsinnaasunik, kiisalu kommunalbestyrelsip meeqqeriviullu nammineq anguniagaanik killissarititaanillu naammassinninnersooq.

*Imm. 3.* Imm. 2-mi pissutsit eqqaaneqartut saniatigut pinngortarfimmi isumannaallisaaneq, ikuallattoornissamut tunngasut, eqqiluisaarneq peqqinnissarlu nakkutilliinermut ilaatinneqarput.

§ 2. Kommunalbestyrelsimit kommunimi meeqqeriviit tamarmik nakkutiginninnissamut ersarissumik tunngaveqartumik assigiimmik nakkutilliivigineqartarnissaat qulakkeerneqassaaq.

## Kapitali 2

### *Nakkutilliinermut killiliussat, tunngaviit akulikissutsit*

§ 3. Kommunalbestyrelsi nakkutilliinermut killiliussanik aalajangersaassaaq aamma nakkutilliinertik avammut saqqummiunneqassaaq kommunip nittartagaatigut.

*Imm. 2.* Kommunalbestyrelsip nakkutilliineranut killiliussani nalunaarsorneqarsimassaaq:

- 1) Nakkutilliinerup siunertaa,
- 2) suna nakkutilliivigineqarnersoq,
- 3) nakkutilliinerup akulikissusia
- 4) aamma nakkutilliineq qanoq aaqqissuunneqarsimanersog, aamma
- 5) nakkutilliinermut ilanngullugu atuisunik misissuineq ingerlanneqarnersoq.

**§ 4.** Kommunalbestyrelsip nakkutilliinera oqaluuserisassanik aalajangersimasunik tunngaveqarluni ingerlanneqassaaq, taanna kommunimi meeqqerivinnut tamanut assigiimmik atorneqassaaq. Immikkut illuinnartumik pisoqartillugu oqaluuserisassat meeqqerivinnut ataasiakkaanut sammitinneqarsinnaapput, meeqqeriviup pineqartup ilusiata tamanna pisariaqartippagu.

*Imm. 2.* Nakkutilliinermut tunngavigineqartumi piumasaqaatinik allassimasunik, allaaserinninnernik pitsaasunik imaluunniit periutsumik immikkut ittunik sakkunilluunniit kommunalbestyrelsi atuissaaq, naliliiviginiarlugu:

- 1) meeqqeriviup ilinniarfusussatut avatangiisii,
- 2) meeqqat atugarissaarnerat aamma
- 3) meeqqeriviup kommunip anguniagaanik naammassinninnera.

**§ 5.** Kommunalbestyrelsip meeqqerivinnik nakkutilliinera arlaleriarluni ingerlanneqartassaaq aamma killiliussani allassimasut malillugit akulikissuseq piffissamillu atuneq aalajangersimasog atorneqartassaaq, tak. § 3, imm. 2-mi, nr. 3.

*Imm. 2.* Meeqqeriviit tamarmik § 1, imm. 1 naapertorlugu amerlaqatigiissunik nalunaarutigineqareersimasunik nakkutilliivigineqartassapput, immikkut soqutigineqartuugaluarpataluunniit nalunaaruteqaqqaaranilu nakkutilliivigineqaralarpata.

### **Kapitali 3**

#### *Arlaannaannulluunniit attuumassuteqannginneq*

**§ 6.** Kommunalbestyrelsip nakkutilliinera naliliinissamut toqqammavissat kinaassusersiunngitsumik paasineqarsinnaasut aallaavigalugit arlaannaannulluunniit attuumassuteqanngitsumik nakkutilliinermut tapersersuisumik ingerlanneqartassaaq.

*Imm. 2.* Arlaannaannulluunniit attuumassuteqanngitsumik nakkutilliinermut tapersersuineq pissaaq, kommunalbestyrelsip:

- 1) perorsaanikkut suleriaatsimut piumasaqaatinik takussutissanillu meeqqat atugarissaarnerannut tapersersuutaasinnaasumik, ilinniarfusussatut avatangiisinik pitsaasunik, kommunip anguniagaanik aamma suliniuteqarfusussanik aalajangersaaneratigut,
- 2) perorsaanikkut suleriaatsimik meeqqat atugarissaarnerannut tapersersuutaasinnaasumik, ilinniarfusussatut avatangiisinik pitsaasunik, kommunip anguniagaanik aamma suliniuteqarfusussanik allaaserinninnernik pitsaasumik oqaasertalersuineratigut, imaluunniit
- 3) perorsaanikkut suleriaaseq taanna meeqqat atugarissaarnerannut tapersersuutaaneramik, ilinniarfusussatut avatangiisit pitsaasuunerannik, kommunip anguniagaanik aamma suliniuteqarfusussanik uuttuinissamut periutsumik sakkumilluunniit atuinnermigut.

**§ 7.** Pisortatigoortumik nakkutilliineq § 8, imm. 1-imi, nr. 1 naapertorlugu inummit suliassanik allanik meeqqerivimmuq tunngassuteqartunik isumagisaqareersumit, tassunga ilanngullugu ilitersuinerimik imaluunniit aqutsinerimik suliaqartumit isumagineqaqqusaanngilaq, suliaasaqarfinnik assigiinngitsunik suliaqarnermut atatillugu akisussaaffiit ersarissumik immikkoortinneqarnissaat qulakkeerneqarsimappat.

*Imm. 2.* Kommunalbestyrelsimi ilaasortat nakkutilliinerimi peqataaqqusaanngillat.

## **Kapitali 4**

### *Nakkutilliinerup ilusaa aamma nakkutilliinerup annertussusia*

**§ 8.** Kommunalbestyrelse imatut nakkutilliissaaq:

- 1) pisortatigoortumik nakkutilliinertut, tamanna nalunaaqqaarluni nalunaaqqaarniluunniit nakkutilliinertut ingerlanneqassaaq, aamma
- 2) pisortatiguunngitsumik nakkutilliinertut, ingerlatsiveqarfiup meeqqeriviillu ataasiakkaat akornanni ingerlaavartumik attaveqatigiittarneq ilanngullugu.

*Imm. 2.* Pisortatigoortumik nakkutilliineq imm. 1-imi, nr. 1 naapertorlugu aaqqissuunneqassaaq, oqaasertalerneqarlunilu nakkutilliinerimik ingerlatsisoqarneranik paatsoortoqannginnissaa siunertarlugu.

**§ 9.** Pisortatigoortumik nakkutilliineq meeqqerivinni ataasiakkaani tamani ikinnerpaamik ukiumut ataasiarluni nalunaaruteqareerluni nakkutilliinertut aamma ikinnerpaamik ukiumut ataasiarluni nalunaaruteqaqqaarnani nakkutilliinertut ingerlanneqartassaaq.

**§ 10.** Nalunaaruteqareerluni nakkutilliinerimi periutsitut atorineqarsinnaavoq:

- 1) meeqqerivimmi ulluunerani pisortamik naapeqateqarneq
  - 2) perorsaanikkut avatangiisini angalaarunneqarneq,
  - 3) sulisunik oqaloqateqarneq imaluunniit apeqqarissaarneq,
  - 4) meeqqeriviup pisortaanut allakkatigut saaffiginninnerit,
  - 5) meeqqanut meeqqerivimmuq attuumassuteqartunut angajoqqaanik oqaloqateqarnerit
  - 6) kommunip meeqqeriviini atuisut ataatsimoorfiannik aamma meeqqerivinni namminersortuni siulersuisunik oqaloqateqarnerit
  - 7) allaganngorlugit paasissutissat, aamma
  - 8) meeqqerivimmi perorsaanikkut ataqatigiissitsinerit aaqqissuulluakkamik misissuiffiqineqarnerat
- Imm. 2.* Nalunaaruteqaqqaarnani nakkutilliinerimi imm. 1-imi, nr. 1-3-mi periutsit eqqaaneqartut atorineqarsinnaapput.

*Imm. 3.* Nakkutilliinernut ikinnerpaamik nakkutilliinerimut ataatsimut § 8 naapertorlugu ilaatinneqassapput, meeqqeriviup nunaminertaqarfiani angalaarunneqarneq kiisalu meeqqeriviup pisortaanik sulisunillu aamma ajornanngippat meeqqerivimmi meeqqanut angajoqqaanik oqaloqateqarneq.

**§ 11.** Nalunaaruteqareerluni nakkutilliisut meeqqeriviup aqutsisunik oqaloqatigiinnissamut pitsaasumik toqqammavissaqarnissaaq, aamma illuatungerisat attuumassutillit piareersarnissaminnut

peqataanissaminnullu periarfissaqartillugit qulakkiissavaat.

*Imm. 2.* Nalunaaruteqaqqaarnani nakkutilliinerit ima pilersarusiorneqassapput, taamaasilluni ulluunerani neqeroorut pineqartoq nakkutilliinissamut piareersarnissaminut angumersisinnaassanngilaq, ajornartorsiutillu attuumassutillit nakkutilliisunit malugineqanngitsoortillugit.

*Imm. 3.* Nalunaaruteqareerluni nakkutilliinerit, imm. 1 naapertorlugu, nakkutilliisoqartinnagu ikinnerpaanik sapaatip akunneri 2 sioqqullugit nalunaarutigineqassapput.

#### *Nalinginnaasumik nakkutilliineq*

**§ 12.** Nalinginnaasumik nakkutilliinerit nalunaaruteqareerluni nalunaaruteqaqqaarnaniluunniit meeqqerivinni nakkutilliinertut ingerlanneqartassapput nakkutilleeriaaseq meeqqeriviup kommunalbestyrelsillu akornanni aqqissuussamik atassuteqartarnermik oqaloqateqartarnermillu aallaaveqartoq atorlugu.

*Imm. 2.* Nalinginnaasumik nakkutilliinerup minnerpaamik erseqqissaavigissavaa:

- 1) meeqqerivik kommunalbestyrelsimit akuerineqarsimanersoq aamma akuerineqarnermut uppernarsaammik meeqqerivimmi ersittumik inissinneqarsimasumik peqarnersoq,
- 2) akuerineqarnermut uppernarsaat paasissutissanik inatsisitigut pisussaaffigineqartunik imaqarnersoq,
- 3) meeqqerivimmi akisussaaffimmik, piginnaasanik suliassanillu agguarneqarnerannut ersarissunik ilitersuuteqarnersoq, tassunga ilanngullugu ilitersuutit allaganngorlugit igineqarnermut, naluneqarnatik tamanillu pissarsiariuminarnersut,
- 4) meeqqat pissutsini toqqissisimanartuniitinneqarnermut, aamma ulluinnarni sammisassaqartitsinerit isumannaatsunik killissaqartinneqarlutik ingerlanneqartarnermut, tassunga ilanngullugu pinnguartarfiup aqqissuussaanera aamma pinnguartarfimmi atorlut isumannaatsuunersut,
- 5) eqqiluisaarnissamut pissutsit ajunnginnersut,
- 6) meeqqanik angallassineq sunaluunniit tassunga ilanngullugu imaatigut angallassineq pissutsit toqqissisimanartut atorlugit pisarnersoq,
- 7) tupa avatangiisillu pujortarfiunnginnissaasa qulakkeerneqarnissaa pillugu inatsisit eqqortinneqarnermut,
- 8) pissutsit sillimasiinerup tunngasut eqqortinneqarnermut,
- 9) sulisunik nutaanik ilinniartitsineq naammaginnartumik ingerlanneqartarnersoq, tassunga ilanngullugu paarlattaasartut taartaasartullu,
- 10) napparsimalluni sulingitsoortarnerit amerlassusiat
- 11) sulisut sulingitsoortarnerannik suliaqartarnermut ingerlatseriaatsimik peqartoqarnersoq, tassunga ilanngullugu taartaasartunik aggersaanermut il.il. ingerlatseriaatsit, aamma
- 12) meeqqeriviup aqutsisui siusinnerusukkut nakkutilliisoqarneranut atatillugu uparuaasoqarsimappat malitseqartitsisimanersut.

#### *Perorsaanermut tunngasunik nakkutilliineq*

**§ 13.** Perorsaanikkut nakkutilliinerup minnerpaamik erseqqissaavigissavaa:

- 1) sulisut piginnaasaat tamatumunnga inatsisitigut piumasaqaataasunik naammassinnissimanersut,
- 2) sulisut amerlassusissaannik kommunalbestyrelsip aalajangersaasimanera eqqortinneqarnersoq,

- 3) upalungaarsimanissamut pilersaarut suliarineqarsimanersoq, meeqqanut suli atualersimanngitsunut perorsaanikkut ineriartuutaasumik neqeroorutit pillugit Inatsisartut inatsisaanni § 20, imm. 2-mi minnerpaaffissatut piumasaqaatit piviusunngortinneqarsimanngippata,
- 4) meeqqanut ataasiakkaanut tunngatillugu attaveqaatit akornanni ataqatigiissakkamik suleqatigiinnissap qulakkeerneqarnissaanut pisariaqartitsineq naapertorlugu suleqatigiissitanik pilersitsisoqarsimanersoq,
- 5) suleqatigiissitat taakku suleqatigiinnerminnut atatillugu attaveqaatigiittut naapeqatigiittassapput, tamatumanilu meeqqap angajoqqaatut oqartussaasui imaluunniit pilersuisuiusut peqataatillugit, meeqqanut ataasiakkaanut siusissukku iliuuseqarnissaq siunertaralugu,
- 6) meeqqeriviup pisortaa ikinnerpaanik ukiumut pingasoriarluni atuisut ataatsimoorfinik aggersaasimanersoq atuisut ataatsimoorfisa inatsisitigut suliasaqaarfigisaannik isumaginninnissaq siunertaralugu,
- 7) meeqqerivik suliasanik kommunalbestyrelsip anguniagassat killissarititullu aalajangersagaanik isumaginnittarnersoq,
- 8) meeqqerivinnut ataasiakkaanut perorsaanikkut ukiumut pilersaarummik aalajangersaasoqarsimanersoq, taanna malinneqarnersoq, aamma taanna nalilersuiffiqineqartarnersoq,
- 9) perorsaanikkut anguniagalimmik sulisoqartarnersoq,
- 10) meeqqat ataasiakkaat inerikkiartornerat pillugu ataatsimoortumik naliliinikkut naliliinerit uppersaasarsuinerillu ingerlaavartumik isumagineqartarnersut, meeqqallu inerikkiartornera minnerpaamik ukiumut marloriarluni allaaserineqartarnersoq,
- 11) ikinnerpaanik ukiumut marloriarluni meeqqap pilersuisuinik oqaloqateqartarnersoq meeqqap inerikkiartoqqinnerani suleqatigiinnissaq siunertaralugu,
- 12) meeqqat meeqqerivimmut allatseqqasut nalunaarsorneqartarnersut, meeqqat aqqi, inuttut normui, angajoqqaatut oqartussaasut aamma meeqqamik pilersuisuiusut aqqi, meeqqallu aninerani tamatumunnga pissutaasoq ilanngullugit,
- 13) takkunnerit nalunaarsorneqartarnersut, aamma taanna perorsaanikkut ukiumut pilersaarut ilanngullugu tamatumunnga kommunalbestyrelsip piffissaliussaata iluani kommunalbestyrelsimut nassiunneqartarnersoq,
- 14) meeqqerivik meeqqat mappiinik pilersitsinersoq nutarterisarnersorlu taakkulu atuarfimmu meeqqap atuarfigiligassaanut nassiussimanerai tamatumalu ilutigisaanik meeqqerivimmi meeqqat mappii suujunnaartinneqarnersut,
- 15) meeqqap meeqqerivimmiit meeqqerivimmut allamut nuunnerani meeqqerivimmi meeqqap qimataani sulisut aamma meeqqerivimmi nuuffiqineqartumi sulisut akornanni suleqatigiittoqartarnersoq aamma meeqqap pisariaqartitaanik isumaginninnissamut atorneqartussanngorlugit meeraq pillugu paasissutissat attuumassutillit ingerlateqqinneqartarnersut,
- 16) meeqqat meeqqerivimmiinnertik iluarisimaarneraat,
- 17) meeqqat perorsaanikkut tarnillu pissusaatigut siunnersorneqartarnersut,
- 18) meeqqerivimmit nalunaarutiginnittussaataaneq pillugu maleruagassat eqqortinneqarnersut,
- 19) meeqqeriviup aqutsisui siusinnerusukku nakkutilliisoqarneranut atatillugu uparuaasoqarsimappat malitseqartitsisimanersut.
- 20) meeqqanik pinerliisimannginnermik uppersaammik pissarsinissamut pisussaaffik pillugu Inatsisartut inatsisaat naapertorlugu meeqqeriviup sulisuinut meeqqanik pinerliisimannginnermut uppersaaitit piniarneqarsimanersut.

## *Nakkutilliinermi nalunaarusiaq*

**§ 14.** Kommunalbestyrelsi nakkutilliinerit ataasiakkaat kingorna § 10 naapertorlugu nakkutilliinermut nalunaarusiortassaaq, taanna malitseqartitsinermut paasissutissiisumik naammaginartumillu tunngavissaqarnissamik qulakkeerinnittuussaaq.

*Imm. 2.* Nakkutilliinermut nalunaarusiaq llinniartitaanermut Naalakkersuisoqarfiup ileqqusutut nakkutilliinermi nalunaarusiassatut suliarineqarsimasooq atorlugu minnerpaamik § 13-imi pissutsit eqqaaneqartut misissuiffiqineqarnerannik aamma isummerfigineqarnerannik imaqassaaq, tassunga ilanngullugu pissutsit suut pitsanngorsaavigineqassanersut aamma iliuuseqarfigineqassanersut. Aammattaaq nakkutilliinermut nalunaarusiaq paasissutissanik makkuninnga imaqassaaq:

- 1) Ulloq nakkutilliiffiusooq.
- 2) Kina, nakkutilliinermik ingerlatsisimanersooq aamma kina, nakkutilliinermi meeqqerivimmut sinniisuusimanersooq.
- 3) Nakkutilliartornissaaq nalunaarutigeqqaarneqarsimanersooq imaluunniit nalunaarutigeqqaarneqarsimannginnersoq.

**§ 15.** Nakkutilliinermi nalunaarusiaq kingusinnerpaamik ullormi nakkutilliiffusimasumit qaammatit 2-t qaangiunneranni naammassillugu suliarineqareersimassaaq kommunillu nittartagaatigut tamanut saqqummiunneqarluni. Tamanut saqqummiussineq pissaaq paasissutissat inunnut ataasiakkaanut tunngassuteqartut takuneqatsaalillugit.

## **Kapitali 5**

### *Malitseqartitsineq*

**§ 16.** Kommunalbestyrelsi meeqqeriviit assigiinngitsut apeqqutaatinnagit nakkutilliinernik aaqqissugaasumik allaganngorlugit katersisassaaq.

**§ 17.** Kommunalbestyrelsi nakkutilliinermut malitseqartitsisassaaq, meeqqerivimmi pissutsinik uparuartariaqartunik paasinnittoqarsimappat.

*Imm. 2.* Malitseqartitsineq ingerlatseriaaseq aalajangersimasooq tunngavigalugu pisassaaq, taanna kommunalbestyrelsimiit aalajangersarneqassaaq.

*Imm. 3.* Kommunalbestyrelsi nakkutilliinermut malitseqartitsinertut meeqqerivinni pissutsinik uparuartariaqartunik paasinnittoqarfusimasuni tamani suliamik ingerlatseqqinnissamut iliuusissatut imaluunniit ineriartortitsinissamut aalajangersimasunik pilersaarusiussaaq.

## **Kapitali 6**

### *Ajornartorsiutinik aaqqiisarneq aamma ineriartorneq*

**§ 18.** Nakkutilliineq meeqqerivinni ataasiakkaani ajornartorsiuteqartoqarsimatillugu aaqqiissutissanik innersuusseqataasinnaavoq ujartueqataasinnaallunilu.

*Imm. 2.* Sulisut akornanni imaluunniit angajoqqaat sulisullu akornanni aporaaffeqartoqarsimatillugu,

tamanna aamma nakkutilliinermi pisussaaffigisanut ilaavoq aporaaffiit taakku aaqqiivigineqarnissaanut illuatungeriit suleqatigalugit misissuinissaq ikiuunnissarlu.

*Imm. 3.* Nakkutilliineq meeqqerivimmik immiut ikiornertut ikiuunnermut iluaqutaassaaq, taamaalilluni meeqqerivimmi siunissami suliaassanik unammillernartunillu nutaanik namminneq nassaartoqarsinnaalluni.

**§ 19.** Assigiinngitsunik suliallit ilisimasaat kommunalbestyrelsip nakkutilliinera tunngavigalugit porsarneqarsimasut kommunalbestyrelsip kommunimi meeqqerivinni suliaasaqarfimmik nalinginnaasumik pitsaassutsinik ineriartortitsineranut aamma meeqqerivinni ataasiakkaani pitsaassutsit eqqarsaatigalugit qulakkeerininnissaminut pisussaaffimminik malinninneranut tunngavissisussaapput.

*Imm. 2.* Kommunalbestyrelsip imm. 1-imi ilisimasaat taakkartorneqartut ineriartortitsinissanik pilersaarusiornerni aamma suliniuteqarfigisanik pilersaarusiornerni atussavai aammalu kommunimi sullissinerup qaffasissusianik aalajangersaanermini ilanngutissallugit.

*Imm. 3.* Kommunalbestyrelsip ilisimasaat imm. 1-imi taaneqartut meeqqerivimmi aqutsisut sulisullu meeqqerivinnut suliaasaqarfimmi pitsanngorsaannissanut ineriartortitsinissanullu periarfissat pillugit kommunimi perorsaanikkut periutsinik ineriartortitsinermut nutarteriffigalugit atorneqarnissaat qulakkiissavaa.

## Kapitli 7

### *Pingaarnertut nakkutilliineq*

**§ 20.** Ilinniartitaanermut Naalakkersuisoqarfimmit kommunalbestyrelse paasissutissanik tunniusseqquneqarsinnaavoq, tassunga ilanngullugit allakkianik, kommunalbestyrelsip nalunaarut taanna naapertorlugu nakkutilliisuutitaanerminik isumaginninnersoq paasiniallugu pisariaqartinneqartut isigineqartunik tunniusseqquneqarsinnaavoq.

*Imm. 2.* Imm. 1-imi suliaasat taaneqartut Ilinniartitaanermut Naalakkersuisoqarfimmi isumagineqarnissaat siunertaralugit kommunalbestyrelse imatut iliusaaq:

- 1) § 14-imi taaneqartut nakkutilliinermi nalunaarusiat Ilinniartitaanermut Naalakkersuisoqarfimmut ingerlateqqissavai aamma
- 2) meeqqerivinni meeqqat amerlassusilerneqarnerat, atorfiit amerlassusilerneqarnerat aamma atorfiit qanoq inuttaqartinneqarnersut pillugit paasissutissanik nalunaarutiginnissalluni, tassunga ilanngullugit ilinniagarisimasanik tunuliaqutigisat.

*Imm. 3.* Kommunalbestyrelsip imm. 1 aamma 2-mi paasissutissat taaneqartut piffissaliussat malillugit Ilinniartitaanermut Naalakkersuisoqarfimmut nassiutissavai.

*Imm. 4.* Kommunalbestyrelsip imm. 2-mi taaneqartut nalunaarutiginninnerit Ilinniartitaanermut Naalakkersuisoqarfimmit elektroniskiusumik nalunaarutiginniffissatut oqaatigisaanut nassiutissavai.

## Kapitli 8

### *Atuutilerfia*

**§ 21.** Nalunaarut manna atuutilissaaq ulloq 1. oktober 2020-mi.

*Namminersorlutik Oqartussat, ulloq 24. september 2020*

Karl Frederik Danielsen

/

Karsten Peter Jensen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut